

EL CHEPOSO DE FONZ



CRA Estadilla-Fonz

EL CHEPOSO DE FONZ

Karina Vereha Hlibka
Carmen Antonia Martínez Alegre
Yekaterina Fesyk
María Ruvira Quesada
Lara Playán Girón
Manuel Meler Quintilla
Martín Garcés Buil
Laia Espías García
Mario Bistuer Serrat
Rubén Ruvira García
Javier Facerías Hijes
Lorena Ascón Fumanal
Ana Ferrer Huete
Florin Leonard Gogu
Eric Ascón Carreño
Soraya Benchili Bakrim

Diseño y maquetación: Publicomp

Edita: Gobierno d'Aragón. Dirección Cheneral de Política Lingüística

D.L.: Z-301-2020

CRA Estadilla-Fonz





En un llugar prou tal cual, lleno de buena chen, de casas grans, buenos montes y sierras altas, viviba en el campanal un pobre desgraziau, cheposo de nazimiento, pobre de per vida y despreziau per toz, en espezial per los críos del llugar.

Pedret, de ixa manera se llamaba el pobre cheposo, abeba naziu sin pare y su mare se va morir cuan él era chicot. Así que van ser los curas y las monchas los qu'el van criar.

Cuan se va fer gran se i va posar a vivir en el campanal de la iglesia y la suya faena era la de tocar las oras, la campana del perdiu per la tarde y avisar a la chen la ora de misa, entierros y si caleba tocar a fuego, si s'en apretaba en bel puesto.

Comeba de lo que la chen le daba y portaba ropa vieja, con calzons desfilorchaus y chambras llenas de tacas.

Los críos del llugar no feban otra cosa que reír-se-le-ne y burllar-se-le-ne. Ixo el posaba triste y cada día estaba más enrabiau, asta que un día va dezidir que lo millor que i podría fer sería minchar-se-los poquet a poquet asta que no en quedase ninguno en tot el llugar.

Y así va ser como va empenziar; al tocar las doze campanadas de media noche baixaba las escaleras de caragol del campanal y cantaba:

Cuan estoi dormín,
yo me desperto,
voi a la suya casa
y los foi llamín.





De día abeba triau el crío que más se l'en abeba reiu y a estraletazos estricallaba la puerta y se llevaba al desgraziau del crío en dentro de un saco.

A la noche siguiente, tornaba a fer la misma istoria ...

Cantaba:

Cuan estoi dormín,
yo me desperto,
voi a la suya casa
y los foi llamín.
Y s'en llevaba un atro crío.





Primero abeba pensau en posar-los en el caldero y minchar-se-los, pero, a la fin, le van dar peneta y solo los va colgar de las orellas debaixo de las campanas. Los pobres ninos no feban más que chemecar y chemecar, pero, como ninguno los sentiba, ninguno subiba a aduyar-los.

Los pares de la villa van empezar a angoixar-se de no saber res de los suyos fillos y se van posar d'alcuerdo pa ir-ye a la Guardia Zevil a denunziar.

Los guardias no feban otra cosa que buscar-los per los llugars d'alrededor, per los Palaus, per las basas y pozos, pero nada d'ixo va servir de res. Cada día n'abeba un nino menos en el llugar.



Un sábado, cuan las yayas estaban en misa y Pedret abeba baixau a fer de monaguillo, una nina se va soltar de las orellas y va emprender a correr escaleras enta baix asta llegar a la iglesia.

¡Ninas, ninas, mia qué está astí! -va dir una de las agüeletas que abeban iu a misa.

Cuan las otras mullers se van dar cuenta de que la nina baixaba del campanal y de que el culpable de tot ixo abeba siu Pedret, van enganchar a correr detrás d'él dán-le garrotazos con los ganchos asta que el van dixer moliu a tochazos.

Las mullers, como van poder, van llegar al cabo'l campanal y van soltar a los otros ninos.

Tot el pueblo se i va posar muy contento d'aber-los trobau y van fer una fiesta más gran que la de San Blas.



Pero... astí no va acabar la istoria. Los pares, cuan se van enterar de per qué Pedret abeba fecho ixo disparate, van pensar que caleba dar-les un escarmiento a los suyos fillos pa que no s'en tornasen a reír de ninguno.

Y..., colorín, colorau, este cuento s'ha acabau y per la chuminera el fumo s'ha escapau.



ARAGÓN

www.lenguasdearagon.org

 **GOBIERNO
DE ARAGON**